

編號 8 號

【坎下該頭杌仔樹】徐秀英原作

歌在鄉下，屋脊幾幾頭仔番樣¹樹、牛眼、杌仔係當平常个，一到打子个時節，管佢有熟抑吉熟，反正食得个東西，細人仔絕對無放過佢！就係吵著睡當晝个叔公叔婆來大聲逐，該下晝就無戲好唱哩。

吾屋下就在伙房个最尾析，崎仔溜啊下就係喇坎，坎下个圳溝係細人仔熱天个天堂，洗身仔、戙魚仔、捉蝦公、釣蛤蟆蚵仔，麼个想得著个空頭，細人仔就搥得著來搞！該頭杌仔樹，就係對坎下該石壁頂啲出來个。

吾婆當好食這頭个黃杌仔，見看著杌仔會食得該駁仔，佢就會怙等杖仔行兼來同偌這兜細啞仔講，青杌仔食咁會局硬屎，愛等佢黃咁正好食。細人仔嘴頂應講好，一群豺狗哪！哪管得著²佢兜該張嘴，幾雙賤手揪得著个，全部都摘來塞牙縫咧，除了打在忒樹尾摘毋著个！吾爸就會拿竹篙叉去夾下來，較硬个佢會自家食，較熟个佢會放在米缸裡背，翕加兩日仔正拿去吾婆間項。無牙齒个阿婆，糜啊糜欵，面頂滿足个笑容，到這下偌都還記得。

¹ 番樣：音 fan' son；芒果。

² 哪管得著：音 nai gon' e' diau'；哪管得住。管不住。

該頭杌仔樹頂，輒常就會有青鸛仔³飛來做實：青鸛仔毋驚人，偌兜在樹下搞家啦飯仔，佢兜在樹頂啲啲滾飛來飛去；細人仔雖然番綻，毋過從來毋識去撞過厥實。較盤擎个會厥上石壁去算看啊，實肚生有幾多粒卵。一駁仔過後，樹頂又加加幾下隻得人惜个細鳥仔哩啲，就恁仔生生不息。

樹頂高也有膨尾鼠跳上跌落，還有共樣毋驚人个山狗太、狗嫲蛇趁上趁下。膨尾鼠尾絨絨，當得人惜，屋下食伸个果子抑係果仁、果子皮放在樹底下，佢兜會輪等跳過來食，咕嚕嚕个目珠仁換振轉，該驚人來搶食个樣仔，實在還生趣。山狗太、狗嫲蛇就無恁得人惜咁，因為厥皮膚有保護色，分樹梗抑係燥葉仔壅到共下个時節，一無注意就會害人分佢嚇著，故所偌盡惱山狗太。

恁多年過去咧，坎下該頭杌仔樹早就毋在咁，毋過，該童年个回憶，哪久就恁香甜个放在吾心肝肚。

³ 青鸛仔：音 qiang' li' e'；綠繡眼。